

# Grischuns han sittau bein

Al tir «LZ-Cup» ein siat tiradurs dil Grischun sequalificai pil secund final

DA LEILA CADRUVI / ANR

■ **Sonda vargada, ils 16 da settember ha il tir «LZ-Cup» giu liug a Buchs el cantun Argovia. Ils dus Sursilvans Nadja Caviezel da Camuns e Tarcisi Cadruvi da Ruschein han sittau fetg bein. Els ein omisdus daventai secunds, Caviezel cul caliber pign e Cadruvi culla buis d'assagl 57.** Dapi igl onn 1997 dat ei igl «LZ-Cup». Quei tir sustegn il cader naziunal da tir. Per quei motiv lavuran ils tiradurs dil cader naziunal sco funcziunaris da quella concurrenza. Biars tiradurs numnan quei tir era il «Cup da Subaru» perquei che la societad d'acziun Subaru Svizra regala mintg'onn in auto da ver 30'000 francs. Uonn ei la tiradura dil cader naziunal *Nina Christen*, ch'ei daventada sisavla als giugs olimpics a Rio, stada la dila da cletg. Pils finalists spetgan era schiglioc premis attractivs d'ina valeta totala da 40'000 francs.

**Secund plaz per Cadruvi**

Dil cantun Grischun sequalifichaschun tschun tiradurs silla distanza da 300 me-

ters pil secund final: *Dirk Frischknecht, Tarcisi Cadruvi, Miguel Sgier, Carl Frischknecht* ed *Andri Krebs*. Per sequalificar pil final a Buchs settan ils tiradurs sis siets silla noda 100. El stan da sittar «Im Losdorf» setta lu mintga tiradur diesch siets silla noda 100 en 20 minutas. Ella categoria A sco era ella B dat ei treis gruppas da mintgamai 30 tiradurs. Ils emprems sis tiradurs da quels 30 sequalifichaschan pil secund final.

Al secund final cun tons Grischuns camonda il plidader *Beat Müller* 15 siets mintgamai enteifer 45 secundas. Ils tiradurs entscheivan a survegnir battacor. Ei drova bia gnarva d'esser ruasseivels, sco tiradur, denton era sco aspectatur. Il 15avel siet sa aunc decider tut. Il campion grischun Cadruvi setta il davos siet in 92 e fa in total da 1370 puncts. Cun quater puncts da meins eis el aschia sil secund plaz. Era igl onn vargau ha il tiradur da Ruschein perschuadiu, el ha numnadamein gudignau quei tir. Cun in 71 eis el denton uonn pli che cuntents ed havess buca tertgau ch'ei tonschi aunc ian gada per in plaz sil podest. Plinavon settan era ils ulteriurs Grischuns fetg



Ils finalists dil secund final dil «LZ-Cup»: *Nadja Caviezel, Miguel Sgier, Tarcisi Cadruvi, Dirk Frischknecht* e *Carl Frischknecht* (da sen.). Silla fotografia mauncan *Andri Krebs* e *Flavio Gruber*.

FOTOS MAD



Ils dus tiradurs sursilvans *Nadja Caviezel* e *Tarcisi Cadruvi* ein cuntents cun lur secund plaz.

bein. *Dirk Frischknecht* da Tumeigl daventa cun 1767 puncts tierz. El final han *Frischknecht* sco era *Cadruvi* nudau in da 100. Il giuven *Sgier*, che ha gitg dominau quei final, ei vegnius quart. Per sis puncts ha ei buca tunschiu pil podest. *Carl Frischknecht* daventa siatavel ed il tiradur da Sent, *Krebs*, daventa cun 1316 puncts endischavel. Ella categoria A sequalifichascha sco sulet Grischun *Flavio Gruber* dad Alvagni pil secund final, el vegn 18avel.

**Era Nadja Caviezel secunda**

Silla distanza da 50 meters sequalifichaschan dus tiradurs dalla Surselva pil tir:

*Nadja Caviezel* e *Corsin Derungs*. Cul caliber pign settan ils tiradurs era diesch siets per sequalificar pil secund final. Ils dus tiradurs ch'ei omisdus dil vitg muntagnard Camuns ein semtgai per la sfida. *Derungs* entscheiva cun in 100. Suenten setta el buca sco gaviuschau ed asta cun quei tener polischa a sia con-tiradura. Lezza setta fermes 933 puncts e sequalifichascha pil secund final. Silla noda da diesch fust quei stau ina passa da 98 puncts.

El secund final va ei lu per la ligiongia. La plidadra *Nina Christen* camonda igl emprems siet. *Caviezel* noda in 83, e quei resta per cletg era il sulet siet fleivel

dalla giuvna. Sco silla distanza da 300 meters decida era cheu il davos siet. Cun 1405 puncts daventa la giuvna *Lumneziana* secunda. Pigl emprems plaz havess ei mo duvrau in sulet punct. Denton il plascher pil secund plaz ei fetg gronds. Ella ei pertscharta che era gia astgar esser dalla partida al tir «LZ-Cup» ei ina fetg buna prestaziun. Ils tiradurs cul caliber pign han giu da sittar da narr per sequalificar. Els han giu da nudar ina passa da 100 puncts e siat ga 99 puncts. *Caviezel* sco era *Derungs* han omisdus fatg duas ga ina passa da 100 ed ein aschia en mintga cass sequalificai pil final.

## Baghegiar hotels e casas aultas

La baselgia libra a Glion envida puspei al divertiment cun Legos

■ (anr/abc) **Dapi zacons onns organisescha la baselgia evangelica libra a Glion mintgamai il settember ad ina fin d'jamna da construir.** Ella sala dall'antieriura scola da tgirunzas ei la tschepa da Legos semtgada. Il marcau da Lego ei in'ocurrenza unica. En tuttas regiuns dalla Svizra s'entaupan affons e carschi per construir culla tschepa da Lego. «Nus baghegiein communablamein in marcau gigantic», declara *Hansjörg Sprenger*. Il predicatur e menader dalla raspada dalla baselgia evangelica libra da Glion

emposta mintg'onn ina camiunetta pleina cun tschepa da Lego. Quella stat a disposiziun als affons e carschi che vulan sedivertir cun ina purschida unica: Ils massa cartuns e conteniders cun tschepa vegnan transportai ella sala dall'antieriura scola da tgirunzas a Glion. En quei baghetg sesanflan las localitads dalla baselgia libra e leu han affons e carschi caschun da baghegiar communablamein in marcau da diesch meters lunghezia, cun biaras casas, in stadiun da ballapei, in bein puril, sgrattaneblas, hotels, ina ba-

selgia, casa cumin e bia auter. *Sprenger* e sia squadra da gidonters envidan tuts «impressaris» denter otg e 12 onns a quei program divertent a Glion. Il vendergis sera allas 18.30 tochen allas 20.45 vegn entschiet e cuntinuau la sonda gl'entir gi naven dallas 09.30 tochen allas 16.30. La dumengia concluda il piazzal da baghegiar cun ina vernissascha dall'ovra finida.

**Interessents pigns e gronds san aunc s'annunziar pils gis da construir cun Lego tier Hansjörg Sprenger, mail: h.sprenger@bluewin.ch, tel. 081 544 56 18.**



In marcau da Lego da diesch meters construeschan ils participonts ella sala gronda dall'antieriura scola da tgirunzas a Glion. FOTO A. BEELI



## Affons dil 3. quartal dall'annada 2016

Suenten las presentaziuns dils affons dil secund quartal dall'annada 2016 vul *La Quotidiana* cuntinuar cun presentar ils affons dil tierz quartal 2016. Nus dein la pusseivladad agl entir intschesch romontsch da separticipar.

Tarmettei pia ina foto actuala da vies affon ch'ei naschius denter l'entschatta fenadur ed ils 30 da settember 2016 cun las suandontas indicaziuns.

- num e prenum digl affon
- data da naschientscha
- liug da domicil
- num e prenum diils geniturs

La foto digitala duei esser sil pli pauc 500 KB. Fotografias da handy ein buc adattadas, bunas fotos sin pupi perencunter bein. Secapescha che lezzas vegnan returnadas.

Las fotografias e las indicaziuns ein d'inoltrar entochen l'entschatta october 2017 alla suandonta adresa:

La Quotidiana  
L'annada 2016  
Via Sommerau 32  
7007 Cuera

e-mail: redacziun@laquotidiana.ch

Ord il ravugl dallas annunziats inoltradas trai la dila da cletg treis victurs. *La Quotidiana* selegra dils purtrets dils affons romontschs ed engrazia per la collaboraziun.